


**TEZAU LITURGIC**

**17 FEBRUARIE**

**ACATISTUL  
SF. MUCENIC  
VASILE IVANOV  
DE LA  
MOSCOVA**



**MOSCOVA, 2000**



# Акафист святому новомученику Василию Иванову

## Кондак 1

Избранный страстотерпче и преславный поборниче за веру Святую Православную, непоколебимый столпе Церкви Христовой, еяже ради положил еси душу твою, сокрушая козни нечестиваго зловерия, прославлен был еси от Предвечнаго и Триипостаснаго Бога Нашего венцем мученическим. И яко имея дерзновение ко Всесвятей Троице, моли и нам верными Христу выну быти, да любовью величая память твою, взываем ти сице:

Радуйся, святой новомучениче Василие, Церкви Христовой всечестное украшение!

## Икос 1

Ангелов Творец яви тя во дни мятежа и нестроения в земли нашей, ревнителя Веры Православныя и вернаго служителя Церкви Христовой, всеславне Василие. Мы же ныне похвальная воспевам ти, святой страстотерпче, и с сонмом новомучеников - Ревнителей Церкви, кровию своею всю Россию освятивших величаем тя и приносим ти похвалы своя:

Радуйся, учение нечестивых безбожников

отвергший;  
Радуйся, благодатию Божией просвещенный;  
Радуйся, заповеди Христовы всем житием  
воплотивый;  
Радуйся, евангельския Истины исповедниче  
неустрашимый;  
Радуйся, яко в подвиге твоём имя пресвятая  
Троицы дивно прославивый;  
Радуйся, верность Спасителю мученичеством  
доказавый;  
Радуйся, просвещение мудростию Божиею  
сущих в неверии;  
Радуйся, всем христианом доброе поучение и  
окормление;  
Радуйся, святой новомучениче Василие, Церкви  
Христовой всечестное украшение!

## **Кондак 2**

Видя Христос Бог душу твою, всеславне  
Василие, ко приятию слова Божия  
предуготованную, просвети тя благодатию  
своею, ограждая от влияния лжепророков рая  
земнаго, ты бо выну Пути, Истине и Жизни  
неизменно до кончины мученическа твоя  
следовал еси; ныне же веру соблюдши, яко  
верный воин Христов, радуешься в Небесном  
Отечестве, воспевая Господеви: Аллилуйа.

## Икос 2

Разум небесный тебе даровася, святче Божий: измлада бо в кротости пребываяй, от юности твоя благочестивыма родители в трудолюбии и вере отцев твоих воспитан был еси. Егда же в стране Российстей времена тяжкая для Православия насташа, преславный поборник истины Христовой даже до смерти явился еси. Сего ради прими убо от нас хвалебное пение сие:

Радуйся, Распятого Спасителя последователю всеусердный;

Радуйся, Небеснаго Домовладыки слуго благий и верный;

Радуйся, от праздности и лености удалитися ны научаяй;

Радуйся, всех нас угождати Спасителю токмо подвизаяй;

Радуйся, в уповании на милосердие Божие нас утверждающий;

Радуйся, дела наша к славе Божией исправляющий;

Радуйся, силами духовными нас насыщаяй;

Радуйся, во трудах благолепия церковнаго нам споспешествуяй;

Радуйся, святой новомучениче Василие, Церкви Христовой всечестное украшение!

### **Кондак 3**

Силою Духа Святаго укрепляемый,  
новомучениче Василие, небрегл еси о немощней  
плоти твоея, Спасителю мученичеством  
добропобедным угодивше. Аки на брак ко  
Христу приглашен быв, поспешил еси в обители  
райския внити. Сего же ради тебе, заступниче  
наш и покровителю, и венчавшему тя венцем  
всепобедным Всемогущему Богу взываем в  
церковном собрании купно: Аллилуиа.

### **Икос 3**

Имуще тя, новомучениче Христов, скорого в  
бедах помощника благовернии людие, в  
напастех и скорбех тя на помощь молитвенно  
призывают, и милость небесную молитвами  
твоими от щедродавца Бога обильно  
приемлюще, тебе от любве теплыя хвалебно  
вопиют:

Радуйся, силою честнаго Креста Господня и  
Евангелия веру истинную защищавый;

Радуйся, веру в воскресшаго Иисуса всем  
сердцем возлюбивый;

Радуйся, Богом дарованный талант много  
преумноживый;

Радуйся, путь страданий Христа ради  
добровольно избравый;

Радуйся, в скорбех и муках живот твой  
скончавый;

Радуйся, велию благодать молитвы за нас  
стяжавый;  
Радуйся, от всякаго недуга скоро и благодатно  
нас избавляяй;  
Радуйся, страдания наша в радость пречудно  
претворяй;  
Радуйся, святой новомучениче Василие, Церкви  
Христовой всечестное украшение!

#### **Кондак 4**

Бурею злобы и нечестия безбожническаго  
терзаеми, враги Церкви Христовой, оклеветаху  
тя, яко врага народа российскаго, и приведоша  
во судилище неправедное, иже приговором  
своим чести гражданския ты лиши, ты бо тако  
положил еси начало исповеданию Христова пред  
лицем безбожников, взывая Богу: Аллилуйа.

#### **Икос 4**

Слышавше и видевше гонения на веру  
Православную, безбожныма властитилями  
возвигнутыя, не устрашился еси, всехвальне  
Василие, и не одесную ни ошуюю не отошел еси  
от пути спасительного, егда нечестивыя  
обновленцы полониша храмы в родных местах  
твоих. Таковому же стоянию во истине Христей  
и нас настави, да зовем ти сице:  
Радуйся, ревнителю веры и благочестия  
богоизбранный;

Радуйся, светильниче во дни начавшихся гонений отрадный;  
Радуйся, в лоно Церкви Христовой, к таинствам благодатным призывавый;  
Радуйся, на Господа во всех гонениях и ложных обличениях надежду возлагавый;  
Радуйся, молитвенное дерзновение в чистоте веры обретый;  
Радуйся, всякую печаль от нас удаляющий;  
Радуйся, в вере и благочестии нас утверждающий;  
Радуйся, от напрасныя смерти нас изымающий;  
Радуйся, святой новомучениче Василие, Церкви Христовой всечестное украшение!

### **Кондак 5**

Боготечней звезде уподобился еси, всехвальне Василие, яко столпом Православия был еси всем ближним твоим и тесным прискорбным путем востекл еси в Горний Иерусалим. Путь спасения нам указал еси, да единым сердцем и едиными усты Богу, венчавшему тя и, аки заступника, тя нам даровавшему, умиленно взываем: Аллилуиа.

### **Икос 5**

Видяще тя святаго добропобеднаго мученика Христова, Святая Церковь Православная ныне неизменно подвиг веры и верности твоя, яже ко Спасителю, воспевает, святой Василие и

похвальное пение возносит ти: ты бо ревность  
благую, безстрашие, верность Царю Небесному и  
силу веры в нас молитвами твоима укрепляеши.  
Мы же сего ради с надеждою воспеваем ти  
сицевая:

Радуйся, просвещения духовнаго преславный  
устроителю;

Радуйся, ревностнаго несения Креста Христова  
учителю;

Радуйся, милость и утешение всем чтущим тя  
являющий;

Радуйся, кающимся слезы утешительныя  
низпосылающий;

Радуйся, в терпении и смирении нас  
утверждающий;

Радуйся, падающим руку помощи  
простирающий;

Радуйся, от плевел ненависти сердца наша  
очищающий;

Радуйся, светом любви нелицемерныя нас  
озаряющий;

Радуйся, святой новомучениче Василие, Церкви  
Христовой всечестное украшение!

### **Кондак 6**

Проповедует Церковь Российская славу твою,  
святой Василие, яко веру несумненную,  
надежду крепкую в Иисуса Христа ты  
сподобился имети в душе, живот положивше за

слово Владыки Христа, исповедниче всехвальне. Егда Царь Небесный, к вечной жизни воззовет весь род человеческий, тогда убо помяни и нас, недостойных, стояще купно со всеми страстотерпцы народа нашего одесную Престола Святыя и Единосущныя Троицы, да сподобимся купно с тобою и всеми святыми в нетленной отчизне Господеви воспевати: Аллилуиа.

### **Икос 6**

Возсиял еси, новомучениче Василие, яко светильник пресветлый и был еси ближним твоим, блуждающим во тьме греховней, на путь спасения их наставляя. И ныне сохрани нас, благочестно память твою чтущих, от шатаний умов и сердец, да не погибнем во мраце неведения, да зовем ти сице:

Радуйся, иго Христово всем сердцем возлюбивый;

Радуйся, крест свой любве ради Божия радостно понесый;

Радуйся, велию милость в очах Божиих обретый;

Радуйся, сердца наша огнем Божественныя ревности воспаменяя;

Радуйся, от страха злострадания молящихся тебе избавляя;

Радуйся, многих людей следовати за Христом выну научая;

Радуйся, источниче, молитвами твоими жажду ведения Бога утоляяй;  
Радуйся, суетливья сердца наша от многозаботливости очищаяй;  
Радуйся, святой новомучениче Василие, Церкви Христовой всечестное украшение!

### **Кондак 7**

Хотяще верно заветы Руси Святыя сохранить, благоговейно сберегал еси, богомудре Василие, у себя в доме честных ликов Государя-страстотерпца Николая Вторага и сродников его изображения, исповедуя, яко Православная Церковь почитает царя боговенчаннаго Помазанником Божиим. Ныне во сонме мученическом купно с императором благоверным во славе предстоиши ныне пред престолом Царя Царствующих и воспеваеши, предстательствуя за ны, ангельское пение :  
Аллилуйя.

### **Икос 7**

Новое место служения обрел еси, всехвальне Василие, во храме Вознесения Господня, яже на поле Гороховом во граде Москве, тамо бо, аки староста и ктитор, усердно Богу и ближним твоим послужил еси, неустанными молитвы и труды твоима Царя Небеснаго тихо прославляя. Сего ради просим тя: воспламени в сердцах

наших огонь любви, да тобою наставляемы заповеди евангельския выну соблюдаем, о Боже же, милующем и спасающем ны, с благодарением помышляя, тебе, заступнику многомилостивому и покровителю благому, воспоим с о умилением сице:

Радуйся, сердца наша благодатию Божиею, ти данною, очищающий;

Радуйся, очи наши духовныя к зрению Бога изоощряющий.

Радуйся, вражды и ссоры наша умиротворяющий;

Радуйся, всякий мрак заблуждения от нас прогоняющий.

Радуйся, к терпению лишений и скорбей нас воодушевляющий;

Радуйся, в пренесении бед и испытаний нас укрепляющий.

Радуйся, пламень злобный струями любви твоея угасая;

Радуйся, мир Божий в сердца наша привнося;

Радуйся, святой новомучениче Василие, Церкви Христовой всечестное украшение!

### **Кондак 8**

Странен быв на земли, к горнему отечеству добре шествовал, еси, Христов угодниче Василие, Господа бо всем сердцем и всею душою измлада возлюбив, скорби многообразные Его

же ради добропобедно претерпел еси, егда  
воздвиже враг спасения брань лютую, дабы  
отлучити тя от Христа Спасителя. Ты же,  
презревше вся скорогибнущая мира сего,  
претерпе до конца страдания, и в небесный  
вертоград вшел еси, и до днесь радостно поеши:  
Аллилуйя.

### **Икос 8**

Всего себе Господеви предал еси, святыи  
новомучениче Василие, егда потщался еси  
войти, тесным и прискорбным путем в жизнь  
вечную, презревый вся злопыхания  
богопротивная с кротостью и смирением. От  
своих мучителей взыде на закланье, благодатию  
Христовою укрепляемый. Мы же тобою ко  
духовному подвигу наставляеми, ублажаем тя:  
Радуйся, неправедный приговор с кротостию  
приявый;  
Радуйся, во узилищи смрад и тесноту  
претерпевый;  
Радуйся, муки душевныя пред казнию  
мужественно пренесый;  
Радуйся, страх смертный упованием на Христа-  
Жизнодавца низложивый;  
Радуйся, во страдании твоём диадиму  
нетленную стяжавый;  
Радуйся, аки агнец кровию своею землю  
Российскую омочивый;

Радуйся, мощи твоя на мощи других  
новомучеников положивый;  
Радуйся, муками своими миродержателя века  
сего победивший;  
Радуйся, святой новомучениче Василие, Церкви  
Христовой всечестное украшение!

### **Кондак 9**

Все естество ангельское возрадовашися  
преславней кончине твоей, еюже житие твое  
достойно в веси Бутовстей венчал еси. Лик  
страстотерпец с любовью прият тя, святой  
Василие, и, купно со всеми мученики страны  
российския, ныне во славе пред Престолом  
Всесвятая Троицы во славе неизреченней  
предстоиши. Мы с надеждою на  
предстательство твое, Господеви взываем:  
Аллилуйа.

### **Икос 9**

Витии многовещанная не возмогут изрещи по  
достоянию к восхвалению подвига твоего,  
богоносне отче наш Василие. Ты бо временная и  
земная жизни Предвечного Господа ради  
небрегох, положив душу свою за веру  
Православную. Мы же, зряще немощи и  
несовершенства своя, в сокрушении сердечном,  
с надеждою на предстательство твое,  
восклицаем ти сице:

Радуйся, даже до смерти воле Божией послушливый;  
Радуйся, правды служителю нелицеприятный.  
Радуйся, от земных скорбей пришедый к покою небесному;  
Радуйся, обетованнаго Искупителя лицом к лицу узревый;  
Радуйся, в благочестии и трезвомыслии нас утверждай;  
Радуйся, мрак уныния нашего светом радости о Бозе разгоняй;  
Радуйся, страстями века сего души израненныя омывающий;  
Радуйся, житию богоугодному и благочестию нас научающий;  
Радуйся, святой новомучениче Василие, Церкви Христовой всечестное украшение!

### **Кондак 10**

Спасти хотя мир, Спас на Кресте за нас человек пострада, смертью смерть попрал и воскресением миру живот новый дарова; ты, святой страстотерпче Василие, мужески последовавши Христу Распятому; ныне же во славе предстоя престолу Царя Царствующих купно с царственными мученики молишися о спасении нашем и воскресении веры спасительныя во стране российстей, вопиюще Господеви: Аллилуиа.

## **Икос 10**

Стена и заступление еси, ограждаяй всех, благочестно память твою чтущих, святой новомучениче Василие, и неутомимый страже противу враг видимых и невидимых пребываеши, непрестанно молящися Господу Богу о спасении душ наших и исцеляюще немощи наша. Сего ради умильно вопием ти сице:

Радуйся, светлыми ризами украшенный;  
Радуйся, в Царский чертог вошедший;  
Радуйся, славы присносущныя причастниче;  
Радуйся, света неизреченнаго зрителю;  
Радуйся, право стоящим утверждение;  
Радуйся, заблуждшим кроткое исправление;  
Радуйся, имже житейския нужды разрешаются;  
Радуйся, имже благодатная помощь подается;  
Радуйся, святой новомучениче Василие, Церкви Христовой всечестное украшение!

## **Кондак 11**

Пение умиленное приносим ти, угодниче Христов, яко в рай сладости со всеми праведники вкушаеши, яко сияеши ныне на небесех в сонме добропобедных новомучеников страны российския и купно с ними молишися о возрождении веры Христовой, благочестия и благонравия в земнем отечестве твоём, правы

стеzi указуеши нам к Царствию Христову и научаеши присно Господеви взывати: Аллилуйя.

## **Икос 11**

Светозарнаго светильника, елея молитвы чистыя преисполнена, и пламенем веры светло сияюща, воздвиже тя Господь, святой новомучениче Василие, всем благочестивым христианом, благочестно память твою чтущим. Мы же, очами веры зрим тя в Троическом Свете в сонме святых, в крови Агнчей ризы своя убеливших, выну пребывающего и нам мира и благоденствия просящего. Сего ради с надеждою воспеваем ти сице:

Радуйся, Христа во житии и страданиях ваших возвеличивый;

Радуйся, к Царству Небесному узким путем восшествовавый;

Радуйся, в сонме новомучеников вечный покой и блаженство стяжавый;

Радуйся, хулителей Имени Господня твердостью веры удививый;

Радуйся, на Бога, яко на Помощника и Защитника уповаый;

Радуйся, временною смертию в жизнь вечную пришедый;

Радуйся, победную песнь на Небеси воспевающий;

Радуйся, ангелами пресветлыми присно

торжествующий;

Радуйся, святой новомучениче Василие, Церкви Христовой всечестное украшение!

### **Кондак 12**

Благодатию Всесвятаго Духа укрепляемь, явился еси мучеником во дни нечестивого богоборства во стольнем граде Москве. Твердо стоял еси на камени веры исповедания твоего и, после заточения в тюрьме Бутырстей, веру Истинную мученическою смертию утверди. Мы же ныне молим тя: да не оскудеет вера наша и не умалится надежда наша на Господа, и да поем Ему о тебе: Аллилуйа.

### **Икос 12**

Поюще твое прославление, всехвальне страстотепрче Христов Василие, воспеваем праведное житие твое и пламенеющую любовь ко Господу. Восхваляем мужественное стояние твое в вере истинней и спасительней, ты бо гонения и многия напасти претерпел еси и мученическим венцем увенчан был еси Христом Спасителем и Подвигоположником. И ныне имея тя предстателем и ходатаем спасения нашего, приносим ти похвалы таковая:

Радуйся, непоколебимый столпе Церкви

Православныя;

Радуйся, подвижнице веры и благочестия, от

Господа Славы достойно венчанный;  
Радуйся, мужество неборимое и твердую веру показавый;  
Радуйся, утверждения ради Правды Божией, жизнь свою положивый;  
Радуйся, адаманте крепчайший, во брани супротив беззаконных;  
Радуйся, истиннаго закона Божия скрижале и источнике чистыя благодати;  
Радуйся, лукавое мудрование о земном раи обличаяй;  
Радуйся, нас ко исповеданию Веры Истинныя призываяй;  
Радуйся, святой новомучениче Василие, Церкви Христовой всечестное украшение!

### **Кондак 13**

О пречудный исповедниче и преславный новомучениче Христов и заступниче наш, святой Василие! Приими малое сие моление наше, воздыханием сердец наших приносимое. И испроси у венчавшего тя венцем нетленным Всемилосерднаго Господа Нашего, всем нам чистоты сердечныя и телесныя, благочестия, мира, братолюбия, милосердия и ревности о Святей вере Христовей. Да благодатию укрепляеми и утешаеми, сподобимся купно с тобою во Царствии Небесном во веки воспевати Богу: Аллилуйа.

(Сей кондак– читается трижды; посем Икос 1-й  
и Кондак1-й)

